



PARA peserta terdiri daripada mahasiswa IPT Semenanjung dan Sabah bergambar kenangan. Turut sama dalam program Aman Kampus Di Bawah Bayu adalah badan-badan bukan kerajaan dari Semenanjung dan Sabah.

Aman Kampus bawa misi golongan muda di Sabah

Oleh NIK JASNI CHE JAAFAR

nikjasni_ub@gmail.com

UB 30.06.2012 A5

KOTA KINABALU: Kembara Aman Kampus ke 12 daerah di negeri ini mempunyai maksud yang amat signifikan, kata Presiden Persatuan Alumni Pemimpinan Mahasiswa Aspirasi Malaysia (Aspirasi), Mohd Shahar Abdullah.

Menurutnya, melalui program yang dikenali sebagai Aman Kampus Di Bawah Bayu (AKDBB) itu golongan muda mendapat peluang untuk mendekati masyarakat dan mengetahui isu-isu semasa di Sabah.

“Program ini memberikan ruang kepada anak muda untuk berbakti dan menyuntik kefahaman terhadap kepentingan pendidikan dan kejelasan struktur sosial kepada masyarakat,” katanya.

Tambahnya, program ini juga bakal memperkasakan kebersamaan antara semua negeri sekali gus mempromosikan semangat 1Malaysia.

“Golongan muda adalah penentu masa depan negara. Tindakan mereka hari ini akan menentukan perkara yang akan berlaku pada masa hadapan,” katanya.

Jelasnya, 12 destinasi yang bakal dikunjungi mengikut jadual perjalanan rombongan adalah Kota Kinabalu, Beaufort, Labuan, Sipitang, Tenom, Keningau, Tawau, Semporna, Sandakan, Ranau, Kota Belud dan Tuaran.

“AKDBB adalah platform untuk anak muda menyelami pemikiran dan mendengar suara hati masyarakat yang selalunya mempunyai kepercayaan terhadap anak muda sebagai pengantara masyarakat,” katanya.

Beliau berkata demikian dalam sidang media sempena AKDBB di Universiti Malaysia Sabah (UMS), kelmarin.

Mohd Shahar berkata, AKDBB adalah kesinambungan Aman Kampus fasa pertama, kedua dan kenyalang yang telah dilaksanakan di Semenanjung dan sebelas daerah di Sarawak.

Tambahnya, seramai 70 mahasiswa dari Semenanjung dan 60 mahasiswa Sabah terlibat dalam program ini.

Beliau berkata, pelbagai pengisian disusun bagi AKDBB seperti Info Siswa, Siswa Prihatin, Siswa Taqwa, Siswa Cergas, Pentas Anak Muda, Damping Kampus, Siswa Budaya dan Ikon Siswa.

“Setiap pengisian mempunyai matlamatnya yang tersendiri dan mempunyai kelompok sasaran masing-masing,” katanya.

“Kami juga akan mempergiatkan promosi Kelab Kami Sayang PM. Dalam tempoh program juga kami akan berusaha mengumpul seramai 10 ribu responden kajian yang telah dirangka,” katanya.



MOHD SHAHAR

Beliau menambah, kelab itu mendapat hampir 4,000 penyertaan baru dengan sebahagian besarnya adalah dari kaum Cina.

Katanya, mereka menasaskan kita-kita 5,000 penyertaan dari negeri ini.

Sementara itu, antara institusi pengajian tinggi di Sabah yang menyertai program itu adalah UMS, UiTM Sabah, Kolej Yayasan Sabah, Politeknik Kota Kinabalu dan Universiti Pengurusan dan Sains (MSU).

Program ini turut disertai 21 badan bukan kerajaan (NGO) dari Semenanjung dan Sabah.

Menteri Kemajuan Luar Bandar dan Wilayah, Datuk Seri Mohd Shafie Apdal dijangka merasmikan AKDBB peringkat daerah Semporna.

Ketua Menteri, Datuk Seri Panglima Musa Aman pula dijangka merasmikan majlis penutupan pada 9 Julai nanti.